

PWYLLGOR CRAFFU PARTNERIAETHAU

Cofnodion cyfarfod o'r Pwyllgor Craffu Partneriaethau a gynhaliwyd yn Siambr y Cyngor, Neuadd y Sir, Rhuthun a thrwy gynhadledd fideo, Dydd Iau, 14 Rhagfyr 2023 am 10.00 am.

YN BRESENNOL

Y Cynghorwyr Joan Butterfield (Cadeirydd), Jeanette Chamberlain-Jones, Kelly Clewett, Pauline Edwards, Bobby Feeley a Terry Mendies.

Aelod Arweiniol – Yr oedd Aelod Arweiniol Tai a Chymunedau, y Cynghorydd Rhys Thomas, yn bresennol ar ôl cael gwahoddiad gan y Pwyllgor.

HEFYD YN BRESENNOL

Cyfarwyddwr Corfforaethol Cymunedau (NS); Pennaeth Cynllunio, Gwarchod y Cyhoedd a Gwasanaethau Cefn Gwlad (EJ); Rheolwr Cynllunio Strategol a Thai (AL); Uwch Swyddog Cynllunio Strategol a Thai (JA); Cydlynnydd Craffu (RE); a Gweinyddwyr Pwyllgorau (NH a RTJ).

Cynrychiolydd Clwyd Alyn: Rachael Williams – Pennaeth Tai Fforddiadwy a Gwasanaethau i Gwsmeriaid ar gyfer eitem rhif 6.

Cynrychiolydd Adra: Heledd Owens – Pennaeth Cyllid ar gyfer eitem rhif 6.

Cynrychiolydd Adra: Rhys Parry – Cyfarwyddwr Adnoddau ar gyfer eitem rhif 6.

Cynrychiolydd Cartrefi Conwy: Danielle Mason – Rheolwr Eiddo a Gosod ar gyfer eitem rhif 6.

Cynrychiolydd Cartrefi Conwy: David Lowe – Uwch Reolwr Datblygu ar gyfer eitem rhif 6.

Cynrychiolydd Grŵp Cynefin: Catrin Roberts – Rheolwr Tai Fforddiadwy ar gyfer eitem rhif 6.

Arsylwyr: Y Cynghorydd Gareth Sandilands

1 YMDDIHEURIADAU

Cafwyd ymddiheuriadau am absenoldeb oddi wrth y Cynghorwyr Brian Jones, Raj Metri, Arwel Roberts a David Williams.

2 DATGANIADAU O FUDDIANT

Datganodd y Cynghorydd Kelly Clewett gysylltiad personol ag eitem rhif 6 ar y rhaglen, 'Gosod Lefelau Rhent Fforddiadwy', gan ei bod yn berchennog ar eiddo a rentir yn breifat nad ydynt yn destun rhent cymdeithasol na rhent canolradd.

3 PENODI IS-GADEIRYDD

Yn dilyn ymddiswyddiad y Cynghorydd Peter Scott o'r Pwyllgor wedi ei benodiad yn Gadeirydd y Cyngor Sir, daeth rôl Is-gadeirydd y Pwyllgor yn wag.

Enwebwyd y Cynghorydd Pauline Edwards gan y Cynghorydd Bobby Feeley i gymryd rôl Is-gadeirydd Pwyllgor Craffu Partneriaethau. Eiliwyd enwebu'r Cynghorydd Edwards gan y Cynghorydd Jeanette Chamberlain-Jones. Ni dderbyniwyd enwebiadau eraill ac felly yr oedd y Pwyllgor yn unfrydol:

Penderfynwyd: penodi'r Cynghorydd Pauline Edwards yn Is-gadeirydd ar gyfer gweddill blwyddyn 2023/24 y Cyngor.

4 MATERION BRYD FEL Y'U CYTUNWYD GAN Y CADEIRYDD

Ni chodwyd unrhyw eitemau brys gyda'r Cadeirydd na'r Cydlynnydd Craffu cyn dechrau'r cyfarfod.

5 COFNODION Y CYFARFOD DIWETHAF

Cyflwynwyd cofnodion cyfarfod Pwyllgor Craffu Partneriaethau a gynhaliwyd ar 26 Hydref 2023.

PENDERFYNWYD: derbyn a chymeradwyo cofnodion y cyfarfod a gynhaliwyd ar 26 Hydref 2023 fel cofnod cywir.

Ni chodwyd unrhyw fater mewn perthynas â chynnwys y cofnodion.

6 GOSOD LEFELAU RHENT Fforddiadwy

Croesawodd y Cadeirydd Swyddogion a'r Aelod Arweiniol, y Cynghorydd Rhys Thomas, i'r cyfarfod.

Cyflwynodd Pennaeth Cynllunio, Gwarchod y Cyhoedd a Gwasanaethau Cefn Gwlad adroddiad i'r Pwyllgor ynglŷn â gosod Rhenti Tai Fforddiadwy. Nododd y Swyddogion fod yna berthynas aeddfed a chynhyrchiol gyda Chymdeithasau Tai yn y sir. Yr oedd Cymdeithasau Tai a'r Cyngor yn gweithio'n agos â'i gilydd i ddiwallu'r angen am dai yn y sir.

Arweiniodd Rheolwr Cynllunio Strategol a Thai yr Aelodau drwy'r adroddiad.

Rhennid Rhent Fforddiadwy yn ddau gategori – rhent cymdeithasol a rhent canolradd. Rhent cymdeithasol oedd y math isaf o rent fforddiadwy ac mae'r rhan fwyaf o eiddo'r Cyngor a Chymdeithasau Tai (Landlordiaid Cymdeithasol Cofrestredig) wedi gosod rhent ar y lefel hon. Yr oedd yn ofynnol i bob awdurdod tai lleol a Landlord Cymdeithasol Cofrestredig (LCC) yng Nghymru gydymffurfio â Safon Rhent a Thâl Gwasanaeth Tai Cymdeithasol. Cyflwynwyd y Safon yn rhan o Ddeddf Tai (Cymru) 2014.

Yr oedd yr adroddiad a gyflwynwyd yn ymwneud â rhent canolradd. Pennwyd diffiniad Rhent Canolradd gan Lywodraeth Cymru (LIC) fel rhent sy'n cael ei osod naill ai ar gyfradd y Lwfans Tai Lleol (a bennir gan Asiantaeth y Swyddfa Brisio i fod y traean isaf o renti'r farchnad agored), i fyny i uchafswm o 80% o rent y farchnad; yr oedd y ffigur yn cynnwys taliadau gwasanaeth. Yr oedd Rhent Canolradd yn cael ei arwain gan y farchnad yn hytrach nag incwm ac, felly, yr oedd y codiadau rhent a welwyd yn ddiweddar yn y sector rhentu preifat yn effeithio arno.

Yr oedd Rhent Canolradd yn opsiwn a oedd ar gael i ddatblygwyr preifat ochr yn ochr â pherchnogaeth cartref â chymorth, wrth ystyried rhwymedigaethau cynllunio ar safleoedd datblygu newydd. Yn Sir Ddinbych yr oedd 15 o anheddau yn eiddo i 3 datblygwr preifat gwahanol, a oedd yn cael eu rhentu fel eiddo canolradd.

Yr oedd Tai Fforddiadwy yn y sir ar gael drwy gofrestr Tai Teg a weithredid gan Grŵp Cynefin. Yr oedd 960 o ymgeiswyr ar hyn o bryd yn gwneud cais am Lety Rhent Canolradd, sydd wedi cynyddu'n sylweddol. Gellid egluro'r cynnydd yn y galw oherwydd yr ansicrwydd yn y farchnad swyddi, Brexit a Covid, ac yr oedd prisiau eiddo wedi bod yn cynyddu'n aruthrol hefyd.

Yr oedd problemau wedi bod yn ymwneud â chynnwys taliadau gwasanaeth mewn rhent canolradd, a chynhaliwyd nifer o gyfarfodydd gyda Landlordiaid Cymdeithasol Cofrestredig a swyddogion Llywodraeth Cymru ynglŷn â hyn. Canlyniad y cyfarfodydd hyn oedd y cytunwyd bod canllawiau Llywodraeth Cymru ychydig yn aneglur, ac felly cyhoeddwyd llythyr (a ddisbarthwyd ymlaen llaw, sef Atodiad (iv) yr adroddiad) i egluro unrhyw bryderon gan nodi y dylai Rhent Canolradd gynnwys unrhyw daliadau gwasanaeth.

Yr oedd yna ymrwymiad pellach gan Lywodraeth Cymru i adolygu lefelau Rhent Canolradd yn rhan o bolisi yn y dyfodol; fodd bynnag, nid oedd unrhyw amserlen ar gyfer hynny ar hyn o bryd.

Diolchodd y Cadeirydd i Reolwr Cynllunio Strategol a Thai am yr adroddiad a chroesawu cwestiynau gan yr Aelodau.

Cyfeiriodd yr Aelodau at y taliadau gwasanaeth a holi a oedd hyn yn ffordd gan y datblygwyr o gynyddu rhent. Dywedodd Pennaeth Tai Fforddiadwy (Clwyd Alyn) fod rhai ardaloedd cymunedol yn cael eu cynnal a chadw gan y datblygwr, yr oedd tâl blynyddol ar gyfer pob eiddo a drosglwyddid i'r preswylwyr fel tâl gwasanaeth.

Gofynnodd yr Aelodau a oedd y Cymdeithasau Tai'n gallu addasu'r rhent a thaliadau gwasanaeth pe bai tenant yn cael anawsterau ariannol. Dywedodd Cynrychiolydd Clwyd Alyn eu bod yn archwilio ffyrdd o gynorthwyo tenantiaid i dalu eu rhent drwy roi talebau bwyd ac ynni – yr oedd ganddynt Gronfa i Breswylwyr wedi ei neilltuo ar gyfer amgylchiadau o'r fath – fodd bynnag, nid oeddynt yn dallu atal y taliadau gwasanaeth. Ymgynghorwyd â phreswylwyr er mwyn canfod ffyrdd i ostwng y tâl gwasanaeth cymaint â phosibl; er enghraifft, drwy dorri'r glaswellt mewn ardaloedd cymunedol bob 3 wythnos yn hytrach na phob pythefnos.

Trafododd yr Aelodau a oedd y tâl gwasanaeth yn cynnwys cynnal a chadw ardaloedd chwarae, ac a oeddynt yn dod yn ôl i berchnogaeth gyhoeddus drwy Gyngor Sir Ddinbych (CSDd). Dywedodd Pennaeth Cynllunio, Gwarchod y Cyhoedd a Gwasanaethau Cefn Gwlad y byddent yn codi'r cwestiwn hwn gyda Phennaeth Priffyrdd a'r Amgylchedd, a chael ymateb ysgrifenedig i'r ymholiad i'r Aelodau yn dilyn y cyfarfod. Dywedodd Adra fod ganddynt ardaloedd chwarae cymunedol ar rai o'u hystadau, ond nid oedd gan Glwyd Alyn unrhyw rai. Yr oedd gan rai datblygwyr ardaloedd chwarae ar yr ystadau yr oeddynt yn eu rheoli, ac yr oedd costau cynnal a chadw ar gyfer y rheiny yn cael eu cynnwys yn y taliadau gwasanaeth.

Trafododd yr Aelodau'r cynlluniau cyfathrebu rhagweithiol yr oedd gan y Cymdeithasau Tai ar waith i gynorthwyo tenantiaid ag incwm isel, a holwyd sut oedd Landlordiaid Cymdeithasol Cofrestredig yn cyfathrebu'r gefnogaeth a oedd ar gael gydag aelwydydd a oedd yn cael y trafferthion mwyaf.

Dywedodd cynrychiolwyr o Glwyd Alyn ac Adra eu bod yn rhagweithiol iawn wrth ddarparu gwybodaeth i denantiaid am y gefnogaeth a oedd ar gael iddynt. Yr oedd ôl-ddyledion tenantiaid yn cael eu monitro'n ofalus, a gwneid cysylltiad uniongyrchol â'r tenant er mwyn archwilio dulliau posibl o gynorthwyo a allai fod ar gael iddynt. Hysbysid tenantiaid am asiantaethau a allai eu cynorthwyo i gael mynediad at unrhyw grantiau / cyllid yr oedd ganddynt hawl i'w cael. Cyn neilltuo eiddo i denantiaid, cynhelid gwiriad fforddiadwyedd ar bob tenant er mwyn sicrhau eu bod yn gallu fforddio'r eiddo. Yr oedd Swyddogion Ymyrraeth Gynnar hefyd ar waith i gynorthwyo tenantiaid a oedd yn ei chael yn anodd. Rhoddodd pob Landlord Cymdeithasol Cofrestredig amlinelliad o'i wasanaethau cefnogi ac ymyrraeth gynnar a oedd ar gael ac yn cael eu darparu i denantiaid a oedd yn cael trafferthion. Pwysleisiodd pob un fod cynnal iechyd a lles eu tenantiaid yn rhan annatod o'u busnes o ddydd i ddydd, ac yn elfen graidd y tu ôl i'w sefydliad.

Holodd yr Aelodau a oedd pob Cymdeithas Tai'n cyfathrebu gyda'i gilydd ac yn rhannu gwybodaeth. Eglurodd Pennaeth Cynllunio, Gwarchod y Cyhoedd a Gwasanaethau Cefn Gwlad fod perthynas waith agos iawn rhwng Cymdeithasau Tai a'r Cyngor. Cynhelid cyfarfodydd rheolaidd er mwyn cael trafod cynlluniau ar gyfer y dyfodol a phryderon a oedd yn dod i'r amlwg.

Holodd yr Aelodau a oedd yr Heddlu'n bresennol yn y cyfarfodydd rheolaidd a gynhelid pe bai yna denant trafferthus – byddai hyn yn caniatáu i'r wybodaeth gael ei rhannu. Dywedodd Rheolwr Tai Fforddiadwy nad oedd yr Heddlu'n bresennol yn y cyfarfodydd hyn am eu bod yn cael eu cynnal er mwyn trafod arferion a phrosesau yn bennaf. Os oedd unrhyw achosion o ymddygiad gwrthgymdeithasol, cynhelid cyfarfod amlasiantaethol ar wahân.

Gofynnodd yr Aelodau ynglŷn â chytundebau tenantiaeth ac a oeddynt yr un fath yn yr holl Gymdeithasau Tai. Eglurodd Pennaeth Tai Fforddiadwy (Clwyd Alyn) fod gan bob Cymdeithas Tai gontract safonol, a elwid hefyd yn Gontractau Meddiannaeth,

ar gyfer tenantiaid Rhent Canolradd, ac yr oedd yr un polisiâu a gweithdrefnau wedi eu hamlinellu ynddynt. Yr oedd y contractau hyn yn gontractau treigl, ac yr oedd gan bob tenant Swyddog Tai dynodedig a oedd ar gael i roi cyngor iddynt a'u cyfeirio at asiantaethau a gwasanaethau eraill a fyddai efallai'n gallu darparu cefnogaeth iddynt.

Ar ddiwedd trafodaeth fanwl diolchodd y Cadeirydd i'r swyddogion a chynrychiolwyr yr holl landlordiaid cymdeithasol cofrestredig a oedd yn bresennol am roi atebion cynhwysfawr ac adeiladol i gwestiynau'r Aelodau. Bu i'r Pwyllgor:

Benderfynu: *yn amodol ar y sylwadau a'r arsylwadau uchod –*

- (i) *cadarnhau ei fod wedi darllen a deall y broses o osod rhenti canolradd; a*
- (ii) *chefnogi parhad y gwaith gyda Landlordiaid Preifat a Landlordiaid Cymdeithasol Cofrestredig i weithredu rhenti canolradd yn strategol lle bo'n briodol, er mwyn datblygu cymunedau cynaliadwy a chynnal tenantiaethau fforddiadwy.*

7 RHAGLEN WAITH ARCHWILIO

Cyflwynodd y Cydlynnydd Craffu yr adroddiad a'r atodiadau (a ddisbarthwyd ymlaen llaw) yn gofyn i'r Aelodau adolygu rhaglen waith y Pwyllgor ac yn rhoi'r wybodaeth ddiweddaraf ar faterion perthnasol.

Trefnwyd cyfarfod nesaf Pwyllgor Craffu Partneriaethau ar gyfer 8 Chwefror 2024. Nodwyd un eitem ar gyfer y cyfarfod nesaf:

- Prosiect Ysbyty Cymunedol Gogledd Sir Ddinbych – hysbyswyd yr Aelodau bod yr eitem wedi ei gohirio dros dro tan gyfarfod y Pwyllgor ym mis Mawrth 2024.

Trefnwyd cyfarfod Cadeirydd ac Is-gadeirydd y Pwyllgor Craffu ar gyfer 29 Ionawr, ac anogwyd yr Aelodau i lenwi'r ffurflen berthnasol (a ddisbarthwyd ymlaen llaw) os oedd unrhyw eitemau yr oedd Aelodau eisiau eu hystyried yn y cyfarfod. Nid ychwanegwyd unrhyw eitemau i raglen waith y Pwyllgor yng nghyfarfod diwethaf Cadeirydd ac Is-gadeirydd y Pwyllgor Craffu.

Atodiad 3 oedd Rhaglen Gwaith i'r Dyfodol y Cabinet er gwybodaeth i'r Aelodau. Yr oedd Atodiad 4 yn rhoi rhagor o wybodaeth i'r Pwyllgor ynglŷn ag argymhellion o'r cyfarfod blaenorol.

Amlygodd y Cydlynnydd Craffu ei bod yn ofynnol i'r Pwyllgor enwebu dirprwy gynrychiolydd newydd ar gyfer Grŵp Craffu Cyfalaf yn dilyn ymddiswyddiad y Cynghorydd Peter Scott.

Gofynnwyd am enwebiadau gan yr Aelodau. Enwebodd y Cynghorydd Jeanette Chamberlain-Jones ei hun. Gan na chafwyd unrhyw enwebiadau eraill, cynigiwyd ac eiliwyd bod y Cynghorydd Jeanette Chamberlain-Jones yn cael ei phenodi'n ddirprwy gynrychiolydd y Pwyllgor ar Grŵp Craffu Cyfalaf.

Bu i'r Pwyllgor:

Benderfynu: –

- (i) ***cadarnhau ei raglen gwaith i'r dyfodol fel y'i nodir yn Atodiad 1, yn amodol ar aildrefnu eitem Prosiect Ysbyty Cymunedol Gogledd Sir Ddinbych dros dro ar gyfer cyfarfod ym mis Mawrth 2024 yn lle cyfarfod ym mis Chwefror 2024; a***
- (ii) ***phenodi'r Cynghorydd Jeanette Chamberlain-Jones i wasanaethu fel dirprwy gynrychiolydd y Pwyllgor ar Grŵp Craffu Cyfalaf, i ddirprwyo yn absenoldeb cynrychiolydd penodedig y Pwyllgor yn ôl yr angen.***

8 ADBORTH GAN GYNRYCHIOLWYR PWYLLGOR

Canolfan Asesu Plant Bwthyn y Ddôl: Dywedodd y Cynghorydd Bobby Feeley, cynrychiolydd Pwyllgorau Craffu Cyngor Sir Ddinbych ar Fwrdd Prosiect y cyfleuster hwn, fod y gwaith adeiladu'n mynd rhagddo'n dda ac ymddengys fod popeth ar y trywydd iawn o ran amser. Dywedodd hefyd fod Pennaeth Gwasanaethau Plant y Cyngor yn awyddus i ddarparu adroddiad am y prosiect i'r Aelodau yn y dyfodol agos.

Herio Gwasanaeth – Gwasanaeth Perfformiad, Digidol ac Asedau: Hysbyswyd yr Aelodau gan yr Is-gadeirydd, cynrychiolydd y Pwyllgor ar y Grŵp Herio Gwasanaeth hwn, fod y cyfarfod Herio Gwasanaeth ar gyfer y Gwasanaeth hwn i fod i gael ei gynnal yn gynnar yn y flwyddyn newydd. Anogodd Aelodau a oedd â chwestiynau neu bryderon yn ymwneud â'r Gwasanaeth hwn i'w hanfon ymlaen iddi cyn gynted â phosibl, er mwyn iddi allu eu codi yn y cyfarfod.

Diolchodd y Cadeirydd i'r Aelodau am eu presenoldeb yn y cyfarfod a therfynwyd y cyfarfod.

Daeth y cyfarfod i ben am 11.20am.